

摘藻堂四庫全書薈要

子部

欽定四庫全書薈要

子部

御定書畫譜卷五十七



詳校官兵部主事臣雷純

欽定四庫全書薈要卷一萬一千三百八十九

子部

御定佩文齋書畫譜卷五十七

畫家傳十三

明三

周用

周用字行之號白川吳江人

見書家傳

嘉靖中為吏部尚書

善繪事

列朝詩集

白川師白石翁得其指授

靜志居詩話

王問

王問字子裕學者稱為仲山先生常之無錫人

見書官家傳

至廣東按察僉事點染山水人物花鳥皆精妙

王錫爵

文肅公集

王問善畫山水人物花卉每登眺乘興運筆如飛其畫得於山水間人求之者蓋多不可得

圖繪寶鑑續纂

王仲山畫極蒼古

六研齋筆記

王問官南曹時迎其父澤澤不行命問畫三十扇扇各

一詩自朔至晦日持其一以代子之侍於前也

無錫志

王問作丹青變雲林子久體別具神巧所積宦資盡給
杼軸家織絹供畫瀟灑之韻不可一世

明文別紀

王鑑

王鑑字繼山

常州志云
字汝明

問之子登進士官至太僕寺卿

善畫白描人物畫史會要

鑑畫人物有龍眠之遺

無錫志

侯鉞

侯鉞字義甫東阿人嘉靖辛丑進士授工部主事後拜
僉都御史巡撫大同

分省人物考

侯中丞鉞性能寫人形舉進士同榜三百人皆圖其貌
為一冊藏之再見即數十年無不識者嘗請告行山中
羣盜劫而質之鉞使從者入城取金自與盜款語因熟
視其貌既歸悉圖以送有司按圖擒之無一免者

徐昌

祚燕山叢錄

張合

張合字懋觀永昌人

見書家傳

官至湖廣憲副工書畫

書史會要

蔡一槐

蔡一槐字景明晉江人

見書家傳

為廣東參議作墨蘭石竹

具有意態

閩書

張瀚

張瀚字子文別號元洲仁和人

見書家傳

官至吏部尚書謚

恭懿少擅丹青晚盡棄之

馮夢禎快雪堂集

陸師道

陸師道字子傳長洲人號元洲更號五湖

見書家傳官至尚寶

少卿繪事簡淡咄咄逼倪元鎮

弇州續集

陸士仁

陸士仁字文近號澄湖師道之子山水筆法雅潔不失
文待詔遺意畫史會要

王穀祥

王穀祥字祿之號西室長洲人

見書家傳

善書畫官吏部員外

郎

王世貞吳中往哲像贊

穀祥善繪事點染花卉意致獨到即一枝一葉亦有生色
名山藏

穀祥少寫生渲染有法度為士林所重中年絕不肯落筆凡人間所傳者皆贋本也
藝苑卮言

皇甫濂

皇甫濂字子約一字道隆長洲人
見書家傳嘉靖甲辰進士

拜繕部主事間圖花竹木石並臻佳絕
皇甫司勳集

袁聚

袁裴字尚之吳縣人

見書家傳

任意寫竹枝花朶饒有生趣

晚耕謝湖號謝湖居士

吳縣志

張燕翼

張燕翼字叔貽長洲人

見書家傳

鳳翼獻翼之弟伯仲皆善

詩則亦善詩伯氏善書則亦善書而時時作猗蘭叢蓀

怪石出其表也

弇州續藁

謝時臣

謝時臣號樗仙吳人善山水得沈石田意而稍變焉筆

勢縱橫設色淺淡人物點綴極其瀟灑尤善於水江湖海種種皆妙圖繪寶鑑續纂

樗仙能畫屏障大幅有氣槩而不無絲理之病此亦外兼戴吳二家派者也

陳天定

陳天定字定之號甦菴太倉人家多名畫故畫花草翎毛皆能逼真古人其山水則學沈石田太倉州志

陸治

陸治字叔平居色山因號色山好為古文辭尤心通繪事所傳寫山水折衷勝國名家奇偉秀拔過之點染花鳥竹石往往天造

吳縣志

叔平工寫生得徐黃遺意山水喜倣宋人而時出己意晚年貧甚有貴官子因所知某以畫請作數幅答之其人厚其贄幣以謝叔平曰吾為所知非為貧也立却之叔平畫請之而強必不可得不請之乃或可得

列朝詩集

包山游祝文二先生門其於丹青之學務出其胸中奇

以與古人角一時好稱幾與文先生埒

弇州續藁

陳柱

陳柱

與陸治同時

能畫嘗自題其畫云客有餽櫻桃者兼遺

一雀名曰櫻桃雀遂圖之以紀興

珊瑚網

魯治

魯治號岐雲東吳人善畫著色花草

圖繪寶鑑續纂

治善花卉翎毛

名山藏

朱朴

朱朴字元素號西村為人修挺而臞音琅琅清絕塵少
好詩以至終老未嘗一日廢聲律兼善小幅山水似子
久仲圭

嘉興府志

西村善繪繪成懸壁間玩之作蠅頭楷題詩其上

田藝

衡海鹽文獻志

顧祖辰

顧祖辰字子武世居吳之臨頓里老屋三間破榻竹几
淨無纖塵蒲團茗椀相對靜好埽地焚香翛然自得間

作小詩及畫不必甚工自娛而已

文震孟姑蘇名賢小紀

周天球

周天球字公瑕號幼海吳人

見書家傳

亦善畫蘭乃文人餘

事耳

圖繪寶鑑續纂

寫蘭草法自趙文敏後失傳復於公瑕僅見

畫史會要

吳應卯

吳應卯字三江祝允明外孫

見書家傳

亦能畫作小景平湖

遠嶼得李嵩家法文嘉以為過其草書

無錫志

王復元

王復元號雅賓幼為黃冠得事文徵仲稔其議論風旨
因精鑒古書學米漫仕畫山水類陳道復寫生倣陸叔

平

李日華紫桃軒又綴

陸昞

陸昞字華甫隱居畢澤因號畢淵少從文徵明遊書畫

得其遺意

常熟志

姚沾

姚沾字惟恩號墨仙錦衣千戶餘姚人能詩精妙蘭石
遊吳門與諸名士友善戲寫竹木古樹意頗清遠圖繪
寶鑑續纂

岳岱

岳岱字東伯先世以軍功隸蘇州衛至其父始好讀書
闢草堂於陽山東伯結隱其中自稱秦餘山人又以系
出相臺號漳餘子能詩善畫列朝詩集

王逢元

王逢元字子新上元人畫法趙松雪得其神駿

金陵瑣事

子新無畫家谿徑疎秀可愛蓋風韻骨力出自天成也

江寧志

陳鶴

陳鶴字鳴野山陰人研精詞翰名重一時又善畫水墨
花草獨出己意最為超絕

紹興志

黎民表

黎民表字惟敬號瑤石南海人

見書家傳

寫米家雲山景氣

深潤點綴苔樹間以大綠加濃墨上更極精彩

畫史會要

徐渭

徐渭字文清更字文長山陰人

見書家傳

畫花草竹石皆超

逸有致

袁中郎集

方登

方登字嘯門建業人自號樵成子

見書家傳

畫倣史癡翁

列

朝詩集

杜大成

杜大成字允修金陵人嗜聲詩工音律善畫禽蟲花木
埽除一室焚香酌醴以待四方之士自號為山狂生人
亦以稱之

列朝詩集

陳芹

陳芹字子野家金陵

見書家傳

乘興寫竹枝醉墨欹斜沾濕

衫袖文徵仲嘗戒門下士往南京慎勿寫竹彼中有人
也舉於鄉知寧鄉縣

列朝詩集

陳芹工寫竹間作花卉山水皆入逸品

江寧志

子野墨竹花草絕無一點俗氣

金陵瑣事

盛時泰

盛時泰字仲交上元人

見書家傳

以諸生久次得貢士詩文

善畫水墨竹石文徵仲題其軒曰蒼潤以沈啟南有筆

踪要是存蒼潤畫法還須入有無之句也

江寧志

時泰畫竹石枯木蒼然映人

顧起元懶真草堂集

時泰畫山水木石效倪雲林

上元志

雲浦盛仲交畫有逸才有妙賞金陵瑣事

姚淞

姚淞字元白號秋澗江寧人

見書家傳

晚年工畫梅枝

金陵瑣事

顧源

顧源字清甫號寶幢居士金陵人

見書家傳

少負雋才高自位

置非勝流名僧不與梯接山水師小米

列朝詩集

顧清甫究心禪理而畫自成一家谿徑迴絕人不可及

金陵瑣事

黃克晦

黃克晦字孔昭晉江人家貧學畫復肆力為詩髣髴顏
謝畫筆蒼勁閉戶經月成者尤可傳世

閩書

吳孺子

吳孺子字少君別號玄鐵又號嬾和尚金華人善畫雞
鶩水鳥芙蓉蘆藻幽峭閒適嫣然有致絕不涉丹青

家蹊逕

鄒迪吳山人墓志銘

吳少君善畫有洗硯圖於疎林下略露灘磧委一硯草

中更不作人物

李日華紫桃軒雜綴

茅寵

茅寵號赤川漁父山陰人為樂城簿挂冠以歸釣赤川
上戴笠披蓑狂歌以嘯於世所好一切不以顧獨好畫
畫佳山水處輒欣然神移者終日

鹿門集

宋登春

宋登春字應元趙郡新河人壯歲髮白自號海翁晚居
江陵天鵝池更號鵝池生性嗜酒慕俠能挽強馳騎發
憤讀古人書為小詩畫師吳偉皆不肯竟學里中呼為

狂生

徐學謨海隅集

沈一鳴

沈一鳴字平叔號同漁子海寧人教授鄉里耽詩畫布
衣籜冠鋪糜自適古逸民之流也

陳與郊隅園集

項元汴

項元汴字子京號墨林居士攜李人

見書家傳

畫山水學黃

公望倪瓚尤醉心於倪得其勝趣每作縑素自為韻語

題之

容臺集

元汴山水古木墨竹梅蘭天真雅淡頗有逸趣

畫史會要

項德新

項德新字復初

汪柯玉云墨林第三子

工繪事得荆關法尤善寫

生流傳最少海內得其片紙珍為拱壁

嘉興府志

項聖謨

項聖謨字孔彰

元汴孫

亦以書畫名家貧志潔每鬻畫以

自給然意有不可雖纁帛羔雁未嘗顧也

嘉興府志

項孔彰樹石屋宇花卉人物皆與宋人血戰山水又兼

元人氣韻雖其天韻自合要亦功力深至項子京有此
文孫不負好古鑒賞百年食報之勝事矣

容臺集

鄭本

鄭本字如淵寶應人貢入太學名振六館尤精畫格意
興所至吮豪淥素縱其所如而橫斜偃仰靡不各臻其
妙評者謂其纖穠如黃昌老勁如吳仲圭

朱應登凌溪集

陶賀

陶賀樂平人嘉靖初以歲貢為揚州府學訓導遷通州

學正善畫蒲萄常用泥金巨幅獻上官獲薦為紹興府教授
通州志

黃尚質

黃尚質餘姚人以鄉薦仕景州守
紹興志云嘉靖二十八年舉人善畫山

水人物古色黯然
畫史會要

黃昌言

黃昌言嘉靖時人官吏部有山水大幅傳世不在衡山之下
畫史會要

呂鳴珂

呂鳴珂字聲甫號蒼南文英之孫嘉靖乙未成進士授
刑部主事終工部侍郎贈尚書文英故以丹青擅名鳴
珂少而精其業間一染翰人爭寶之謂置之米王兩君
子間不多讓嬾真草堂集

王問臣

王問臣字剡川長洲人

見書家傳

官至吏部文選員外郎畫

得寫生之趣長洲志

周思兼

周思兼字叔夜號萊峰華亭人

見書家傳

官至廣西提學副

使私謚貞靖先生工小畫

松江志

周貞靖先生小景雲山類米虎兒高尚書

容臺集

胡汝嘉

胡汝嘉字懋禮號秋宇金陵人官翰林編修山水脫去

塵俗但所畫者不多耳

江寧志

戚元佐

戚元佐字希仲號中岳秀水人嘉靖壬戌進士仕至尚

寶卿善書畫

嘉興志

戚中岳畫法巨然筆力蒼勁

秀水志

梁孜

梁孜字思伯號浮山

見書家傳

官禮部主事善書畫

名山藏

梁孜畫追宋元

廣東通志

浮山畫出董北苑吳仲圭雜得文氏三之一

弇州續藁

張允孝

張允孝更名初字太初人稱貞白先生

見書家傳

少游文徵

仲之門善繪畫

松江志

徐蘭

徐蘭字秀夫餘姚人

見書家傳

善水墨葡萄風煙晴雨曲盡

其妙畫史會要

袁達

袁達字德修號佩蘭子閩縣人官至貴溪令間寫蘭竹

一枝一葉不入俗品

閩畫記

蔣嵩

蔣嵩號三松金陵人善山水人物多以焦墨為之金陵瑣事

蔣乾

蔣乾字子健

子嵩

山水過於父隱居蘇之虹橋破屋半間

一介不苟八十年如一日也

畫史會要

陳動

陳動善戲墨山水逼真三松

興化志

簡詔

簡詔興化人山水人物脫去俗調筆勢飛動勃勃有生
氣興化志

李陽

李陽號海逸長垣人嘉靖中為省祭官精於畫理尤工

翎毛

張文燈長垣志

景卿

景卿字夢弼善小景花草自寫杏花題一絕句甚佳今

白下無知之者矣

列朝詩集

唐竹牕

唐竹牕武進人善畫尤以草蟲名一時

唐荆川集

黃漳

黃漳莆田人岳州通判能詩工文翰善畫

閩書

王皋伯

王皋伯字宗舜號夢松閩縣人官南陵教諭工山水精

密秀雅摹倣文待詔

閩畫記

周兆通

周兆通善畫仕女

張鳳翼處實堂集

鍾明傑

鍾明傑號東川家於巴陵以善山水知名

張袞水南集

朱鶴

朱鶴字松隣從華亭徙居嘉定為陸祭酒深客以高雅

有名精雕鏤圖繪之技

徐允祿思勉齋集

王磐

王盤字鴻漸高郵人有雋才好讀書縱情於山水詩畫

一時名重海內

楊珣揚州志

詹仕顯

詹仕顯邵武人司教如皋能詩兼通繪事秋夜見盆菊
影落屏紙扶疎動搖濡墨就影寫之生態具足

如皋志

汪肇

汪肇字德初休寧人工繪事尤長於翎毛豪放不羈自
謂其筆意飄若海雲因自號海雲

徽州志

肇山水人物出入於戴文進吳次翁但多草率之筆金陵瑣事

時儼

時儼號晴川開化人

與汪肇同時

以焦墨作山水人物皆可

觀四友齋叢說

陳有寓

陳有寓休寧人精敏多能善繪仙姬山水而雲煙尤為

長技初號墨泉晚更號水雲道人

徽州志

程達

程達歙人善繪事人物山水能盡六法

徽州志

劉世儒

劉世儒字繼相號雪湖少時見王元章畫梅而悅之柔
密疎簡俱臻其妙

山陰志

劉應龍

劉應龍字明吾別號問心道人世儒孫亦善畫梅

山陰

志

陳詢

陳詢字士問海鹽人能詩及山水畫飲酣潑墨巧奪

生態

海鹽圖經

王儀

王儀字汝儀自稱古鐵生海鹽人

見書畫法吳偉夏景家傳

海鹽圖經

羅素

羅素號墨狂進賢人嘉靖中以畫遊江右作呂廷振

花鳥設色寫生俱能逼真山林樹石筆障亦大做吳偉人物亦能亂真

畫史會要

楊英

楊英寧化人精樓閣嘉靖間屢徵直畫院不往自傷其目

閩畫記

譚翀

譚翀字子羽號平橋一號曲江道人嘉靖時人山水寫吳仲圭亦善花卉

畫史會要

張廣

張廣字秋江無錫人善書畫嘉靖中徵入京待詔內庭
世宗見其萬福圖賞之命盡進所畫於是宦者共屬廣
為圖將獻以邀寵廣辭疾不可明日探之已南歸矣

無

錫志

張秋江寫芙蓉花卉極妙畫史會要

張一奇

張一奇字彥卿沙縣人自號散仙善翎毛山水名聞於

時嘉靖間至京師召畫便殿稱旨授錦衣千戶閩畫記

林旭

林旭字景初善畫山水品格甚高尤精於傳真金陵瑣

事

朱希文

朱希文善畫梅與林旭同時陳鎬金陵人物志

吳河

吳河字萬水大吳人善墨菊作傲霜團露二體尤盡其

妙林應標惠安縣志

張金

張金字德純隱居梅里以畫貓自給貓懸室中真貓見而怒與之鬪

蘇州志

陳言

陳言字國楨無錫人

見書家傳

畫法趙千里

無錫志

周訪

周訪字龍溪與白陽山人陳道復善因工畫花鳥既

而作山水師王蒙負甚不以徇人求者非其人終不可得無錫志

汪徽

汪徽字仲徽婺源人

見書家傳

工畫山水

徽州志

常信

常信字國寶江寧人

見書家傳

官撫州府照磨精六書旁及

繪事

江寧府志

吳孟熙

吳孟熙臨淮人善寫山水不輕售人得之者如拱壁鄭
之亮臨淮志

吳釗

吳釗字文遠號月江臨淮人精於草蟲花鳥年八十筆

愈清麗

臨淮志

賈誌

賈誌字廷真工畫山水人物尤善寫真

鄒政臨穎志

賈謙

賈謙誌弟亦能得其業而略變其法尤稱精緻名畫一
過目即能模寫臨潁志

曹學

曹學字行之號太狂蜀人客遊滇西見書家傳能詩更精於

畫雲南通志

余重謨

余重謨將樂人見書家傳工墨竹延平府志

藍文豹

藍文豹浮梁人善山水竹石又工寫真周起元浮梁縣志

周繕

周繕福安人精畫筆以雅淡見稱閩書

王顯

王顯字希文閩畫記云號西涯邵武人怡情泉石尤工丹青事

母以孝聞閩書

周舫

周舫善繪事伍餘福安吉州志

俞必興

俞必興沙縣人工翎毛

閩畫記

俞恩

俞恩必興子亦能畫

閩畫記

李源

李源號小山又號松山上杭人善作風雨歸舟圖筆氣

瀟散

閩畫記

聞人益

聞人益字仲璣餘姚人山水筆法瀟灑無俗氣畫史會要

韓方

韓方字中直號鶴仙歸德衛指揮善寫墨竹草蟲畫史會要

蘇祥

蘇祥號小泉揚州人善人物山水畫史會要

高松

高松字守之號南崖子又號我山文安人寫山水小景

并梅菊蘭松墨竹鈎勒竹甚佳

畫史會要

劉傳

劉傳字良習號月川含山人工雲山出入高房山何澄之間筆勢遒勁意慮深遠時出已意

畫史會要

杜冀龍

杜冀龍字士良吳縣人山水宗沈石田而稍變動

畫史

會要

季如太

季如太花鳥布置有深思畫史會要

何適

何適字天遊亦號天台山人東莞伯何真後也徙蘄州

畫得戴靜菴筆意畫史會要

朱邦

朱邦字正之別號九龍山樵隱叟山水人物草草用筆

墨汁淋漓與鄭顛仙張平山相髣髴畫史會要

沈昭

沈昭字秋萼長洲人善山水大劈斧著青綠者尤佳畫
史會要

沈鼎

沈鼎昭之兄也善山水畫史會要

葉竹泉

葉竹泉好竹植竹數竿獨吟哦其下每興發輒呵筆濡
墨胸中奇氣一於圖焉發之風雨晦冥枝葉下上橫斜
縱直鸞翔鳳舞變化百出莫窺其妙嘗扁舟遊海上海

上人得尺幅若獲奇寶

沈愷環溪集

王梅夫

王梅夫善寫梅年嘉叙贈詩云吾聞新安孫太守國初
寫梅獨稱右一百年來誰復聞王子於今堪敵手

霞溪

漫藁

黃久菴

黃久菴善畫年嘉叙題其所畫輞川圖云久翁先生酷
愛畫絹素如山收滿架微觀一幅懸中堂新墨淋漓衆

爭詫云是王維輞川景當時筆墨真相亞 霞溪漫藁

王人佐

王人佐字良才號梅泉將樂人善畫梅 吳國倫觀甌洞藁

人佐畫梅枝葉點綴多師王冕筆稍近俗耳 閩畫記

姚子清

姚子清建安人善山水傳山人汝舟贈詩云姚君俗事

一不著却斂多能入畫圖大塗小抹態俱盡高挂徐看

格每殊 閩畫記

林文卿

林文卿號五臺侯官人工山水筆氣清勁濃淡得宜亦精於寫照花竹人物之類

閩畫記

林有臺

林有臺字德基號南山閩縣人官至刑部員外郎精賞鑒多蓄古人名蹟間作山水竹木簡潔可愛

閩畫記

黃用中

黃用中字道行號古山閩縣人能詩善書時作山水竹

石天趣不羣當入逸品

閩畫記

李宗謨

李宗謨號小樵又號古枰子永安人工人物間寫山水

白描亦精緻秀雅

閩書

鍾尚端

鍾尚端武平人善畫尤工傳神

閩書

童養靜 童養廉

童養靜養廉兄弟也連城人俱工畫

閩書

孫萬益

孫萬益歸化人善畫翎毛

閩書

孫克弘

孫克弘字允執

畫引云號雪居

文簡云承恩子也以父任為應

天府治中擢漢陽知府畫山水學馬遠花鳥似徐熙趙
昌又善以水墨寫生及竹石蘭草無不臻妙遠近造請
常滿戶外其儉米氏雲山作仙釋像世尤珍之

松江志

漢陽太守雪居士好遊戲於丹青花鳥生意下筆輒得

其妙晚好寫梅竹蓋亦有雅尚云

莫廷韓集

漢陽竹倣文湖州蘭倣鄭思肖時寫人物兼帶梁楷寫石兼帶米芾寫水兼帶馬遠縱橫點綴皆有根據非畫史市宮苑者所敢望也

陳眉公集

克弘天資高敏下筆蒼古石之玲瓏樹之老幹花之飛舞絢麗葉之反正欹斜從來作手亦當退舍

圖繪寶鑑

續纂

克弘名重一時求繪事者填塞多命門士應之其筆則

用枯老之筆行幹作花或著色或水墨皆極古淡畫史
會要

莫是龍

莫是龍字雲卿以字行更字廷韓號秋水華亭人

見書家傳

善書畫

松江志

是龍云余於繪事時時自適意偶所合作輒亦妄自矜

重不輕示人

莫廷韓集

是龍善山水學黃大癡另得蹊徑其雅秀處人莫能及

圖繪寶鑑續纂

宋旭

宋旭字石門博綜內外典通禪理工畫山水與雲間莫廷韓入爰山社繪白雀寺壁時稱神妙嘉興府志

旭山頭樹木蒼勁古拙巨幅大障頗有氣勢圖繪寶鑑續纂

關思

關思字何思

圖繪寶鑑云一名九思字仲通

號虛白烏程人善畫骨法氣

韻入二李三王之微萬歷間名重海內與宋旭齊名烏程志

關思善畫山水仿唐宋擬王叔明倪雲林更妙初年蹊徑水口猶多重疊至晚年山頭石面麤疎數筆林樹離披略加墨葉人物飄然舟室古雅令人閱之眼界肅清

圖繪寶鑑續纂

顧正誼

顧正誼字仲方華亭人仕為中書舍人畫宗黃公望家

多名人蹟又與嘉興宋旭同郡孫克弘友善窮探旨趣
遂自名家晚居濯錦江上構小園林木清幽終老其間

自號曰亭林

松江志

顧仲方雅好勝國時四大家筆法以故所藏真蹟甚富
暇則展玩臨摹輒得其精意咄咄逼真

莫廷韓集

董其昌云吾郡畫家顧仲方中舍為最著其遊長安四
方士大夫求者填委幾欲作鐵門限以却之

容臺集

正誼畫山多作方頂層巒疊嶂少著林樹自然深秀是

為華亭之派 畫史會要

李紹箕

李紹箕字懋承從婦翁顧正誼學畫仕為南京鴻臚寺序班佐江西幕轉江西都昌主簿涉歷多山川之勝

故運筆益蒼老 松江志

宋懋晉

宋懋晉字明之松江人幼見牧童驅牛從壁上圖之輒神似既長不樂為經生言去而學畫窮日夜臨摹

古蹟從宋旭受業參以宋元遺法富有丘壑若仙山樓閣之屬經營位置莫能過也

松江志

趙左

趙左字文度華亭人與宋懋晉俱學於宋旭懋晉揮灑自得而左不輕涉筆其畫宗董源兼有黃公望倪瓚之意神韻逸發為士林所珍

松江志

文度山水筆墨雅秀煙雲生動烘染得法間用焦墨枯筆為之蘇松一派乃其首創門庭也

圖繪寶鑑續纂

沈士充

沈士充字子居華亭人出於宋懋晉之門亦學趙左兼得兩家法時名最盛郡人能畫者多師之

松江志

曹文炳

曹文炳字德常華亭人學於孫克弘善畫花鳥又從宋旭遊受畫水法及寫竹石皆入能品

松江志

陳穀

陳穀字粟餘華亭人與曹文炳同師為著色花木鳥獸

甚工麗

松江志

陳儀

陳儀字象之穀子能繼其業兼畫人物

松江志

任海村

任海村嘉善諸生有詩名與雲間孫太守雪居同

以畫稱

嘉善志

王翹

王翹

嘉定志云
字叔楚

號小竹嘉定人少為諸生不遂去而學

畫工草蟲其畫花草蛟蝶叢菁蔓藤而蚱蜢絡緯隱
跳其間或巨蟹踉蹌行亂葦沙渚中蝦行鼓水作勢又
水荇一帶羣小魚攢會其底大約運筆似麤率而生
氣爽發絕得其神勢雲間孫雪居極好之以為逸品思

勉齋集

王翹亦時倣米芾為山水

嘉定志

談志伊

談志伊字思重無錫人以父任歷官中府經歷精繪事

作花卉翎毛點綴娟秀出宋人法外無錫志

李開芳

李開芳字伯東號還素閩永春人

見書家傳

成進士授主事

累遷南太僕卿遊戲山水氣韻風生

葉向高蒼霞餘草

顧大典

顧大典字道行吳江人隆慶二年舉進士為紹興府教授遷處州府推官萬歷十二年為山東按察副使謫禹

州知州善繪事能詞賦

潘樞章松陵文獻

顧慶恩

顧慶恩字世卿號綸堂大典子為澱江通判亦善畫名

亞於父

松陵文獻

張復

張復字元春太倉人山水初以石田為宗晚年稍變已
意自成一家

畫史會要

隆萬間吾吳中丹青一派斷矣所見無踰張復元春者
於荆關范郭馬夏黃倪無所不有而能自運其生趣於

蹊逕之外吾嘗謂其功夫不及仇實父天真過之

弇州

續藁

周之冕

周之冕字服卿號少谷長洲人寫意花鳥最有神韻設色亦鮮雅家蓄各種禽鳥詳其飲啄飛止故動筆具有生意

畫史會要

勝國以來寫花草者無如吾吳郡而吳郡自沈啓南之後無如陳道復陸叔平然道復妙而不真叔平真而不

妙周之冕似能兼撮二子之長特以嗜酒落魄如李邕卓
不甚為世重耳

弇州續藁

郁喬枝

郁喬枝周之冕婿師之冕亦擅名

吳縣志

陳裸

陳裸初名瓚字叔裸後以字行去叔更字誠將吳縣人
喜讀離騷文選遊戲繪事善寫山水能肖摹古人筆法
名賢入吳者競購其縑素晚遁跡虎丘以吟咏自適吳

縣志

強存仁

強存仁字善長

見書家傳

善畫山水得黃公望筆意

吳縣志

存仁寫蘭效周天球風韻殊劣

畫史會要

尤求

尤求字子求號鳳丘長洲人移居太倉工寫山水兼人物嘗畫小西門關廟壁作行軍勢又畫弁山藏經閣壁作諸佛像皆絕技

太倉志

尤子求學劉松年錢舜舉而精妙不及五雜組

周鳳儀

周鳳儀字仲來後改名牧尤求之壻亦精畫

太倉志

父質甫

父質甫吳縣人王世貞題其畫云質甫為叔寶休承入

室高足有出藍之美

弇州續藁

高陽

高陽字秋甫四明人善花鳥畫石極精如太湖錦川英

石蠟石皆妙形似 畫史會要

王維烈

王維烈字無競吳郡人花鳥在周之冕下高陽之上畫

史會要

許寶

許寶南直人作山水細石短樹千巖萬壑攢簇而成大幅
筆氣亦秀勁萬歷初年人 畫史會要

朱南雍

朱南雍山陰人隆慶戊辰進士知泰興縣選刑科給事中萬歷八年為太僕寺卿

列卿紀

南雍善畫山水木石法出沈周亦效倪瓚清勁絕俗山陰志

王心一

王心一字純甫別號玄珠又號半禪野叟

見書家傳

萬歷癸

丑進士授行人累遷刑部左侍郎署尚書事畫倣大

癡歸田園詩集

王士昌

王士昌字永叔號斗溟浙臨海人萬歷時官至都御史
撫閩中山水得黃大癡筆意亦能水墨折枝

畫史會要

吳彬

吳彬字文中莆田人善山水工人物萬歷中召見授工
部主事人得其片紙如獲奇珍

福建通志

彬山水布置絕不摹古最為出奇

畫史會要

彬人物形狀奇怪迴別舊人自立門戶白描尤佳筆端

秀雅神宗故稱賞之御府有藏外傳甚少

圖繪寶鑑續纂

文中人物佛像遠即不敢道子近亦足力敵松雪

五雜俎

何淳之

何淳之字仲雍

畫史會要云號太昊

官至御史工山水戲寫蘭竹最

有清趣

江寧志

沈宣

沈宣字明德仁和人萬歷中為安慶府學訓導攻古文辭尤長於詩晚年好畫山水多興致所圖繪者人爭藏

之分省人物考

來復

來復字陽伯三原人

見書家傳

官至布政使善畫

列朝詩集

雷瀛

雷瀛字時登豐城人官至工部員外郎才藻妍瞻又長繪事為藝林所珍

大泌山房集

何喬福

何喬福字廷錫盱之廣昌人讀書不事章句率其意為

歌詩暇日寫花竹水石禽魚皆臻其妙墨竹尤精評者
以為夏太常之後獨步當世求者紛至然不自貴重雖
田夫村叟無少靳

何喬新椒丘文集

楊學詩

楊學詩字可言號琴臺子好武精騎射通音律書畫
俱工

朱良叔猶及編

陳勲

陳勲字元凱閩縣人

見書家傳仕至戶部郎字與畫皆精妙

人寶貴之湧幢小品

詹景鳳

詹景鳳字東圖號白岳山人休寧人

見書家傳

以南豐掌

教入為吏部司務寫墨竹瘦勁絕倫山水做大癡雲

林亦能折枝花草

畫史會要

曹履吉

曹履吉字提遂當塗人官光祿少卿山水師倪元鎮筆

力高雅逸格中第一人也

畫史會要

陸萬言

陸萬言字君策萬歷五年鄉舉能書畫

松江志

萬言山水收景甚豐用筆極簡其為巖岫多用輕綠
染之略皴數筆覺明秀可貴

畫史會要

周時

周時號蟠溪為華州通判家杯湖即唐元孟泛浮處工
詩善畫有雲林大癡之致

高世泰三楚文獻錄

馬明瑞

馬明瑞字道楨平湖人萬歷辛卯舉於鄉為上虞教諭
善畫竹有文與可遺意

平湖志

沈襄

沈襄號小霞山陰人少卿鍊長子善墨梅幹隨筆生枯

潤咸有天趣

山陰志

郝敬

郝敬字仲輿號楚望京山人萬歷己丑進士知縉雲縣

調永嘉拜禮科給事中降宜興丞遷知江陰

安陸府志

郝敬善畫 畫史會要

朱蔚

朱蔚字文豹華亭人萬歷二十九年武進士善畫

蘭 松江志

董其昌云吾鄉朱文豹以韜鈴為冠軍常待詔闕下仰
畫蘭以自給畫蘭深得文太史風韻 容臺集

姚裕

姚裕字啟寧

與朱蔚同時

善畫草蟲有陳淳遺意 松江志

朱多炆

朱多炆字貞吉號瀑泉弋陽僖順王曾孫封奉國將軍
善畫山水花鳥及傳神寫照好遊自詭曰來相如曰澹
遊子問俗弔古有慨於中或歌或泣人莫測其故

大泌山

房集

多炆精繪事見古人墨蹟一再臨之如出其手山水得
二米家法寫生更妙

畫史會要

朱謀鸞

朱謀勳字太冲號鹿洞貞吉子山水花鳥兼文沈周陸之長

畫史會要

朱謀卦

朱謀卦字象吉貞吉子花石肖魯岐雲

畫史會要

朱謀趨

朱謀趨字履中號西澣貞吉姪嫻於文藻寫山水用吳仲圭謝樗仙筆法

畫史會要

朱謀穀

朱謀穀字用虛貞吉姪花鳥纖秀擅名蚤歲

畫史會要

朱多燬

朱多燬字垣佐號崇謙樂安靖莊王孫家有清暉樓
法書名畫盈積几架善寫墨菊亦喜作仙道人物

畫史會要

朱謀穀

朱謀穀字文之號四溟多燬子花鳥得岐雲少谷之

神畫史會要

張萱

張萱字夢奇號九岳別號西園惠州人

見書家傳

官太守不以

繪事名家偶一為之頗饒別趣

畫史會要

王元燿

王元燿字潛之金陵人工山水

遜園居士傷逝記

元燿萬歷中以貲郎官四川藩幕畫從文氏父子入門後學郭熙巨然倪迂皆有其家法鑒畫亦有獨見

江寧府志

歐陽廩

歐陽廩字惟功江寧人

見書家傳

以詩畫名官松潘通判

江寧

府志

姚履旋

姚履旋字允吉

見書家傳

工畫折枝梅花

金陵瑣事

邵穆生

邵穆生字汝宣隱靈鷲山中築閣祀許由及唐宋名賢

善畫有求畫者輒不與曰吾豈畫師邪

杭州志

璩之璞

璩之璞字君瑕上海人

見書家傳

善畫山水亦畫翎毛及水墨

花竹筆致矜貴蕭然清遠

松江志

沈春澤

沈春澤字雨若常熟人

見書家傳

善畫蘭竹得趙文敏意

常

熟志

徐伯齡

徐伯齡嘉興人舉於鄉為甌江教諭善詩畫

嘉興縣志

顧謨

顧謖字從振大石山人元慶第四子能丹青

王穉登雨航志

葛一龍

葛一龍字震甫吳縣人居洞庭東山仕雲南布政理問
能詩亦善寫生有白陽陳氏風

蘇州志

文元善

文元善

文氏族譜云字元長號虎丘

文嘉子婦翁王穉登銘其墓曰畫

品第一詩品第二

蘇州志

文從簡

文從簡字彥可元善子

見書家傳

繪事在雲林黃鶴伯仲之

間 文氏族譜

從簡用枯筆皴斫作方方壺筆法脫盡時人蹊徑

畫史

會要

朱昌孫

朱昌孫字慶餘朱朗子亦能畫有古人風

王孟起續藁

劉原起

劉原起初名作以字行更字子正師錢穀頗肖其神

亦重之 吳縣志

侯懋功

侯懋功字延賞

畫史會要云號夷門

吳縣人師錢穀畫後宗王

蒙黃公望入元人之格為世所珍

吳縣志

陳煥

陳煥字子文號堯峰寄情翰墨興至揮灑能入沈周

之室遂以畫名

吳縣志

煥作山水用筆蒼老勢極空遠

畫史會要

侯懋功早世未竟其業陳煥私淑之聲聞籍甚

顧凝遠

畫引

沈碩

沈碩字宜謙號龍江長洲人善畫山水人物有吳鎮之

風尤善畫白梅翎翅

圖繪寶鑑續纂

碩流寓金陵學畫三年不下樓工於臨摹

金陵瑣事

陳榮

陳榮字蘭谷號雪菴長洲人畫花鳥法宋人院本萬歷

間人畫引

宗周

宗周字思兼號魯山子閩縣人官餘姚主簿工山水專學石田間倣高房山不墮俗格

閩畫記

林存義

林存義字敬坡工花鳥類陳道復

無錫志

林梅

林梅存義子亦能畫

無錫志

張元舉

張元舉字懋賢吳縣人畫得外祖陳道復之傳氣韻生動人以金帛請輒拒酒酣興至縱筆揮灑遠近購其繚素以為珍玩

吳縣志

沈完

沈完字全卿繪人物入仇英之室

吳縣志

李士達

李士達號仰槐吳人畫人物山水名世萬歷間隱居新

郭碧瞳秀腕舉體欲仙

吳縣志

陳遵

陳遵字汝循嘉興人少博雅寄情翰墨壯歲來吳居城西
寫花鳥如生而筆更老海內賞鑒家不惜重金購之履
盈戶然非其人弗屑也暇輒鼓琴自娛尤喜清談飲酒
飲至酣陶然忘世

吳縣志

陳熙

陳熙字子明號五陵家楓橋之僻野畫山水得宋元名

人筆意性豪曠畏塵囂興至揮染購者必坐候乃得吳
縣志

魏之璜

魏之璜字考叔上元人起孤貧業丹青以餬口一部郎
見之賞其筆意稍稍知名杜門匿影日事盤礴天性孝
友養老親撫諸弟胥取給於十指不以干人

列朝詩集

之璜寫山水不襲粉本自初規制巖壑樹石特標靈異

晚用濃墨突筆意貴蒼老稍輸風韻

畫史會要

魏之克

魏之克字和叔考叔之弟也山水克肖其兄

畫史會要

考叔與弟和叔工山水筆法秀美姿顏輒媚有不勝羅綺之態此皆近日行家以畫名者

江寧志

浦融

浦融字通侯善畫臨摹古人莫辨喜作詩酒酣浩歌不輟士大夫多樂與之友

吳縣志

王上宮

王上宮畫羅漢用筆縹緲輕颺似游絲之裊空細髮之拂面而慈威相好無不具足

嬾真草堂集

謝茂昌

謝茂昌畫鬼入神恒自珍秘不輕與人

嬾真草堂集

姚俊

姚俊字叔义家金閭喜吟咏嘗揮染山水饒有古意自

稱玄散道人

畫史會要

胡宗仁

胡宗仁字彭舉上元人隱於冶城山下作畫師雲林子
久老而食貧不謁時貴嘗詠唐六如詩閒來自寫青山賣
不使人間造業錢殊自得也

列朝詩集

胡彭舉畫自文五峰伯仁來晚出入王叔明黃子久二
家其筆意古質頗有五代以前氣象

江寧志

胡宗信

胡宗信字可復宗仁之弟山水最秀潤

金陵瑣事

童珮

童珮字子鳴一字少瑜龍游人從其父以鬻書為業往來吳越間能為詩清俊可誦又善考證書畫金石彝敦之屬列朝詩集

童珮花鳥與呂紀髣髴畫史會要

曾鯨

曾鯨字波臣莆田人流寓金陵寫照入神金陵瑣事

鯨寫照妙入化工道子虎頭無多讓焉烏青文獻

鯨善寫貌儼然如生得筆墨之靈圖繪寶鑑續纂

丁雲鵬

丁雲鵬字南羽休寧人善白描人物山水佛像無不精

妙圖繪寶鑑續纂

南羽白描酷似李龍眠絲髮之間而眉睫意態畢具非
筆端有神通者不能也陳眉公集

吳廷

吳廷字左千南羽同郡人畫亦精雅畫史會要

俞安期吳左千畫佛歌云吳郎善畫能畫佛僧繇道子

與髣髴神化稍讓顧長康其師丁生堪比方當年吳偉
事麤放醜怪惟開羅刹相仇英工緻差足珍嫵媚或失
如來真國朝畫佛有數子丁吳兩人稱絕技吳郎昨圖
接引師西土莊嚴開寶池蓮花葉葉住千佛行樹泠泠
鳴六時又圖釋迦說法舍衛國纓幢百寶玲瓏飾法界
全歸妙有身豪光普放神通力吳郎吳郎汝非夙學無
生來安能下筆劃然心巧開似曾親與如來遇宛然示
我菩提路我今且叩最上層不煩次第求三乘請貌震

維老居士傍添直指西來僧

俞安期琴琴集

熊茂松

熊茂松字汝辰號蘅皋瑞州人官員外郎山水師黃子

久佛像師丁雲鵬畫史會要

程勝

程勝字仲奇號六無歛人工山水

珊瑚網

程勝以焦墨寫蕉蘭肆筆草草晴雨風煙各臻神妙畫

史會要

袁源

袁源

與程勝同時

吳人畫著色人物

珊瑚網

王舜國

王舜國號桂宮南京人萬歷間來居太倉廩墨筆畫人物意疎古絕肖嘗為周百戶畫龍張壁間一日大雨雷電繞屋雨定惟見煙楮龍已脫去

蘇州志

汪都

汪都字瀛海婺源人為薄州吏目工書畫文詞而畫

尤絕技晚年以雙筯代筆山水人物點染頗佳

徽州志

韓景昇

韓景昇善畫不修世人威儀而尤妙於酒境每頌王摩詰科頭箕踞之語撫掌笑悅蓋以其業隱者也

方應祥

來青閣集

郭仁

郭仁號水村工寫大幅山水布置渲染具有成法

江寧志

李存箕

李存箕金陵人山水草樹綽有勝情骨法不凡究為能品
江寧志

朱國華

朱國華齊王孫工寫生繪梨花白燕鸚鵡錦鷄翩然
有生動之狀
江寧志

翟文英

翟文英號三楚山人蘄諸生萬歷間人以詩名尤工畫
人物筆墨瀟灑輒有生氣
翁學淵蘄州志

趙希抃

趙希抃字宋卿甌寧人家貧尚氣節工繪畫善鼓琴長於詩徐中行子與來閩甚加敬禮

閩書

周廉

周廉福寧州人善繪工翎毛自重不輕售

閩書

史朝定

史朝定晉江人善畫美人及寫真

閩書

傅金山

傅金山南安人善畫菜

閔書

徐九牧

徐九牧海鹽人善繪事

海鹽圖經

顧端

顧端海鹽人工詩畫為上舍生

海鹽圖經

唐恩

唐恩號南楚萬歷中人工畫能貌海中神山蓬水即禽
魚卉木罔不探討意象游情物表名重當時

黃承璉海

寧縣志

周珽

周珽字青羊隱居硤川雅吟咏工畫以葡萄擅名蜿蜒生動尺寸有尋丈之勢

海寧縣志

王敞

王敞後所人善畫唐馬傳神諸品俱奇而寫判尤妙遊南畿有武弁眇一目者求圖行樂敞機變即作發弩瞋瞋省括狀就之其人喜甚謝金數斤

唐曹瓊臺志

陳文徽

陳文徽字允諧喜墨竹而秘其長凡見墨竹者知好之而不知為何人所作瓊臺志

金湯

金湯字維垣浙人

見書家傳

能詩畫

山東通志

張應名

張應名字用之膠州人畫山水人物尤工寫真墨竹法

蘇長公文與可

山東通志

趙之璧

趙之璧字十五後改名珣字枝斯莆田人

見書家傳

善丹青

福建通志

王中立

王中立字振之吳縣人作花鳥筆力亦老

畫史會要

錢貢

錢貢號滄洲吳人善山水人物不甚高雅而位置可

觀

畫史會要

周綸

周綸號龍泓京口人善大幅山水萬歷時人

畫史會要

仰廷宣

仰廷宣號筠石維揚人凡作山水先以水暝淨几鋪紙於上用筆點染以取煙潤之態萬歷中來豫章不甚得售乃棄去隱名市肆

畫史會要

沈繼祖

沈繼祖字公繩後以字行更字宜孫吳郡人作山水谿

山宛轉林木森鬱寫閨閣中人亦有態萬歷時人

畫史會

要

袁登道

袁登道字道生號強名東莞人山水宗胡宗仁

畫史會要

朱慶聚

朱慶聚金陵宗室字仲賢號似碧山水與枯木竹石清

雅可觀

畫史會要

黃之璧

黃之璧字白仲上虞人攻辭章書畫與屠隆相友善往來公卿間名重一時畫史會要

吳治

吳治字孝甫吳郡人學趙子固墨梅枝幹盤折花蕊疎秀清寒之氣沁人肺腑萬歷中遊豫章

畫史會要

楊一洲

楊一洲字伯海揚州人山水小幅可觀謝茂秦贈以詩

有畫逼輞川工王維信可同之句

畫史會要

喻希連

喻希連字魯望號素癡江西玉山人慕尚莊老兼通內
學山水法沈啓南皴法麤略不堪近觀十步之外亦覺
巖岫蒼鬱萬歷時嘗遊京師

畫史會要

萬國楨

萬國楨字伯文萬歷末南海貢生善水墨花卉寫竹自
謂得玉局遺法亦作翎羽

畫史會要

朱完

朱完字季美南海諸生與萬國禎同時以墨竹擅長自謂得玉局之法

畫史會要

賴汝遷

賴汝遷南康人善貌人無弗肖者

劉元卿山居草

吳序

吳序字季長善楷法不以畫聞偶寫樹石却有深致濃淡有無極映帶之妙

快雪堂集

華鼇

華翬章丘人以繪事妙天下每落筆輒題詠其上云空
塵詩畫天下稱曰華空塵

王劔尊聞

張恭父

張恭父

神宗時人

汪元恭題其畫柳云近代何人能畫柳東

吳張生稱國手沈周陸治不復作藝苑聲名生獨有借

研齋草

吳東生

吳東生

神宗時人

汪砢玉云武英祕史吳君東生為先公及余

傳小照真三豪妙技當今鸞尉也 珊瑚網

沈柏溪

沈柏溪善墨竹表宗道詩云柏溪先生二室英手扶雲
漢披瑤瓊牀頭百斗自浮湛胃中五車鬪縱橫興來和
墨埽生絹幅幅宛出淇園清古色莽蒼風雨黯元氣淋
漓鬼神驚珍重一竿世希有已覺渭川無千畝瑟瑟霜
葉動秋濤冥冥煙幹蟠蒼蚪瞥睹寒氣生兩腋白雲冉
冉墮虛牖遙想盤礴落筆時瀟湘失色神龍走吁嗟沈

翁直節似此君脩脩得意兼得神湖州太常非其倫表

宗道白蘇齋集

史元昭

史元昭工山水

金陵瑣事

姚衍舜

姚衍舜字光虞工寫竹枝

金陵瑣事

江潮宗

江潮宗字容夫天分甚高詩文可立就顧役志於畫友

人規之則曰世寧有凍餒之江生乎中年家落寔甚嘗
日宴未炊妻孥有愠色猶持筆伸紙作小景忽友人持
錢來至乃付之曰此豈徒得者邪其達如此

金陵瑣事

王允恭

王允恭字謙父號秋巖為和陽教諭工寫竹枝

金陵瑣事

鄭道光

鄭道光字元韜號謙居善寫梅花

金陵瑣事

朱睿燭

朱睿煥號渤海齊王孫山水師倪元鎮金陵瑣事

朱睿晉

朱睿晉字翰之

睿煥弟

畫筆清遠迥無俗塵

金陵瑣事

朱知鄒

朱知鄒字思遠

睿煥子

為諸生後棄去隱溧陽山中能畫

為詩數百首卓然不羣

金陵瑣事

盛事

盛事字不朽工山水

金陵瑣事

劉邁

劉邁字種德工花草

金陵瑣事

朱暉

朱暉工花草

金陵瑣事

俞希允

俞希允折枝花學宋人

金陵瑣事

向昌

向昌

隆萬時人

以詩畫自娛不事生產

海鹽圖經

林裕

林裕善畫

閩書

高坤

高坤工畫尤長於梅

閩書

劉滋

劉滋善畫鷹尤長於竹

閩書

周信

周信字惟實號草庭天長人善畫山水竹石及煙雨圖

種種入妙畫史會要

劉叔雅

劉叔雅高郵人隱居湖濱以高潔稱畫放牛圖入妙時人比之戴嵩畫史會要

鄔昆

鄔昆號石浮山人山水人物不失宋元遺意畫史會要

戴縉

戴縉字冠卿蘇州人以繪事稱畫史會要

唐日昌

唐日昌字爾熾以繪事稱畫史會要

程環

程環徽州人善青綠山水人物其派多從仇十洲出畫

史會要

劉爵

劉爵字子修號易湖淮南人作米氏小景頗佳畫史會要

楊宗白

楊宗白新安人善白描畫史會要

李芳

李芳號湘洲泰州人山水宗文待詔畫史會要

黃希憲

黃希憲字千頃通州人善山水花草畫史會要

曹義

曹義號羅浮長洲人物山水倣倣宋元種種逼真但

未脫院體畫史會要

謝道齡

謝道齡字形臺善折枝花鳥畫史會要

戚勲

戚勲字世臣號曲泉花卉得疎野之趣畫史會要

陸履謙

陸履謙字道卿常熟人善山水畫史會要

劉竒

劉竒字問之武林人山水花鳥人物用筆精工善於設

色畫史會要

蔣龍

蔣龍善花鳥

畫史會要

管稚主

管稚主官中書善山水

畫史會要

何雪澗

何雪澗畫龍虎妙得氣韻

畫史會要

徐昆

徐昆善畫山水

畫史會要

姚仲祥

姚仲祥鳳陽人善畫墨梅

畫史會要

劉世珍

劉世珍字武夷儀真人以繪事名

畫史會要

鄭元勛

鄭元勛揚州人以繪事名

畫史會要

顧驄

顧驄字雲車通州人以繪事名畫史會要

高友

高友字三益四明人善畫畫史會要

袁文可

袁文可善山水人物畫史會要

馬青丘

馬青丘秣陵人善山水畫史會要

吳繼序

吳繼序字季常休寧人流寓金陵工山水佛像仕至中書續說郛

馬電

馬電字元赤金陵人工山水大幅續說郛

朱之士

朱之士字元士金陵人山水花卉皆有生趣而花卉尤工續說郛

鄒春陽

鄒春陽善畫山水

游居錄

徐秀

徐秀畫蒲桃極蚪龍天矯之勢

游居錄

王舜之等四十人

見珊瑚網汪何玉云俱隆萬間人

王舜之 王淳之 呂芝

金士龍 馮曉

陸儀吉 戚仲陞 唐士良 顧時啓 金如初

王異 吳時培 蔣羽化 陳士 金爵

王玄 孫世良 孫有知

已上十八人俱工人物花草

孫瑋

吳習

朱竺

袁玄

王彬

陶冶

文室

浦鯨

姚貞

吳冠

吳稚

戴雲

朱胤達

許九枝

湯時倬

姚元治

朱胤俊

戚伯堅

王祖槐

鄒之孟

杜玄禮

袁麗明

已上二十二入俱工山水

珊瑚網

錢序等四人

見珊瑚網為蔡虧父寫右丞詩意按王穉登跋為萬歷己亥故附於神宗之末

錢序

沈咸

眞語

張存仁

珊瑚網

御定佩文齋書畫譜卷五十七



總校官庶吉士臣張能照
校對官庶吉士臣曹錫齡
謄錄監生臣姜也魯